



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 7

Rashmika-i tang mezungbuba ITF title ka benogo

Sierra Leone ajunga nung curfew benokogo



VOL. XXI NO. 50 (ADOK 50) DIMAPUR TENTONÜ (MONDAY) YIMPOKSÜI (NOVEMBER) 27, 2023 ₹ 5.00

Manipur sorkari UNLF (Pambeil) den yimjung tenangzüktep agitsü

Imphal, November 26, 2023 (Agencies): Manipur state sorkari United National Liberation Front (UNLF) den yimjung tenangzüktep ka agitsü lir ta Chief Minister N Biren Singh-i ashi.

May 3, 2023 nü Manipur nung kin o kin tsungda rara adokba sülen lendenlen aliba telungpur telok kati sorkar den yimjung olemtep tenzükba ija ya mezungbuba asütsü.

Constitution Day amongba anogo nung Chief Minister Biren Singh-i “onok kanga junga jembitepdar aser kobi melii telungpur telok tulu ka den peace accord nung sign süteptsü” ta osangbener dang ashi. Ajisiüaka pai iba dak alia tanga osang kecha melemsatop.

Manipur nung tenemlen aliba telungpu rtelok aikati India sorkar den Suspension of Operations nung sign sütepa lir.

Tesüba mapang Manipur sorkari United National Liberation Front (UNLF) indang telok ka den olemtep alir ta asüba osang metetdakja liasü.

May 3, 2023 nü Meitei aser Kuki-Zo nung tsungda mepetmesü adoka raratsü tenzükba sülen nisung 180 tema taküm samaogo.

Külen, Imphal nung

osangkakettem aser local TV channels-i anogo asem tashi mapa meinyaki aruba atema “ni iba osang ya November 25 nü metet aser CID department dang nungi osang meshiogo” ta CM Biren-i ashi.

Imphal Valley nung media maparen anenba ajanga osangtsüsang belenshiba mali kümogo aser sensotemi timtem kanga ajurur.

Myanmar nung UNLF tesep makdok

Myanmar nung United National Liberation Front (UNLF) tesep ka tangari makdokogo.

Manipur nungi UNLF telok indang tesep ya Tamu township nung lir. Iba ya Moreh nungi kilometre 4 shi pilar dang lir.

Democratic Forces joint force- Peoples Defence Force (PDF) aser Kuki National Army-Burma (KNA-Burma) ajanga UNLF tesep makdok. Iba mapang parnoki kulikakettem aser prangpong-injang aika ngutetogo.

UNLF tesep ya 2020 küm Myanmar Army nungi teyari agia lapokba liasü aser Thanan yimsung nungi mile 2 shi pilar lir.

UNLF aser Democratic Forces tsungda ghonda ka shi khatep ta osang angazüker.

Kuki-Zo nungeri state 5 nung mega-rally agitsü

Imphal, November 26, 2023 (Agencies): Manipur nung lisopurtem asoshi ketdangsubaren balaka meshiba nung yaritepang ta ashitsü atema Manipur MLA 10-i Mizoram Chief Minister Zoramthanga den ajuruteptogo.

Manipur nungi lisopur MLA 10-i Aizawl nung Mizoram CM Zoramthanga den ajurutept.

Lisopurtem asoshi ketdangsubaren balaka meshiba Kuki-Zo nungeri November 29 nü Manipur dak alia state pungu nung sentongtem ayonga agitsü.

Kuki-Zo lisopurtemi November 29 nü Mizoram, Tripura, Delhi, Karnataka aser Tamil Nadu den Manipur kübok district balala nung mega rally agitsü, ta Indigenous Tribal Leaders’ Forum (ITLF) lennir Ginza Vualzong-i ashi.

Manipur lisopur MLA temi Aizawl nung pa den ajuruteptang Manipur aser Nagaland nung aliba Naga lennirtem den Meitei aser Kuki-Zo nunger mepetmesü indang jembitsü mepishi ta Mizoram CM aser Mizo National Front (MNF) president Zoramthanga-i shia liasü.

“Manipur nung Kuki-Zo MLA

temi Naga nunger den tesentaktep tajung yünür. Ni parnok dang Centre sorkar den tesentaktep tajung ayutsü aser Manipur nung atalokba osang tejangia metetdaksütsü shiogo” ta Zoramthanga-isa ashi.

MNF-i Manipur aser Myanmar, Bangladesh o tanga linüktem den Kuki-Zo nunger den külemi noktaker. Mizoram ya alima nung Mizo kin ajak atema lir” ta paisa ashi.

July 25 nü NGOs Coordination Committee-i Mizoram nung ‘Solidarity March’ ayonga agidang Zoramthanga den Cabinet zungsemtem aser MNF MLA temia shilem agia liasü.

Manipur nung kin o kin tsungda mangatetep adokba sülen MLA 10-i lisopurtem asoshi ketdangsubaren balaka meshir. MLA tem rongnung BJPMLA 7 dena lir. Ajisiüaka Centre aser state sorkartem den BJP lennirtemi iba takhangba magizüker aser Manipur longjema lidaktsütsü tenangzükba agiogo.

ITLF-ibo iba mangatetep adokba sülen nungi Manipur Chief Minister N. Biren Singh mapa nungi anentsütsü takhangba agüja arur.

Mizoram arogotemi votes azungba anogo atema sarasadem

Aizawl, November 26, 2023 (Agencies): Mizoram nung arogotemi December 3 nü votes azungba anogo melenshitsu Tsüngremi mapa inyakang ta teyari meshia sarasademogo.

Arogo tongti 15 agi tentetba Mizoram Kohhran Hruaitute Committee (MKHC) ajanga Honibarnü Honibar aonung mesüra Deobarnü Tsüngrem dang Deobar anogo votes azungtsü lemteta aliba anogo melenshitsu atema teyari meshia sarasademtsü tayongzükba agütsü.

Arogo kar nung Honibar aonung iba sentong agi aser tangatem nung Deobarnü agiogo ta arogo lennir kati ashi.

“MKHC-i votes azungba anogo melenshiang ta takhangba agüja aruaka telangzüba kecha mali. Iba atema NGO Coordination Committee

(NGOCC)-i November 28 nü Election Commission den ajuruteptsü anungji arogo zungsem ajaki asen lennirtemi inyakba mapa nung takok angutsü sarasademjang” ta MKHC-i arogotem dangi shidi zülü.

Mizoram nung zungsem teimtiba aliba Mizoram Presbyterian Church-ia parnok zungsemtem dang counting anogo melenshitsu atema sarasademtsü metetdakja liasü.

Külen, zungsem 5 agi akümba NGOCC telok ka tang Delhi nung oa lir. Parnoki Mongulbarnü Chief Election Commissioner aser Election Commission ketdangsurtem den ajurutepta votes azungba anogo melenshitsu atema mepishitsu.

Onoki Hokolbarnü ECI office semdanga ketdangsurtem den

ajuruteptsü mapang meshi ta NGOCC general secretary Malsawmliana-i ashi.

Election Commission-i Mongulbar nikongdang 3:00 ako nung chief election commissioner aser tanga ketdangsurtem den ajuruteptsü temelaba agütsü ta pai ashi.

ECI-i December 3 nü Mizoram, Madhya Pradesh, Chhattisgarh, Rajasthan aser Telangana nung votes azungtsü anogo lemteta lir.

Ajisüaka, Mizoram nung political party tem, civil society organisations aser arogotemi Deobarnü votes azungtsüba magizüker aser Election Commission dang aiben temepishiba yokogo.

Zungsem 40 agi akümba Mizoram assembly atema November 7 nü polling asü.

CNCCI-i MCCI pusema nungiter; NSCN-IM tetuyuba magizüker

Dimapur, November 26, 2023 (TYO): Mokokchung nung NSCN-IM-i Tez, Talab aser moko dak sendakba products noktanga atema CNCCI-ia Mokokchung Chamber of Commerce and Industry (MCCI) tangatetba den külemi noktakba metetdaksüogo.

CNCCI aser MCCI ajanga tobacco products achitsü mayongzüker saka tobacco dak sendakba products ya Goods and Service Tax agütsür alizükba legal products lir aser COTPA regulations sülen anidaka ayoktsü akok. Anungji NSCN-IM-i tangatetba tajung nung tobacco

products noktanger asütsü akok saka iba tetuyuba ya shishilembartemi magizüker ta Media Affairs, CNCCI-i sangdong ka nung ashi.

Shishilembartemi Indo-Naga yimten tekaraba nung latetsü atema yaritepa arur anungji NSCN-IM-i iba atema temulung agüja inyaksüla. Tekaratiba nung Indo-Naga yimten latetsüba ya Naga nunger ajak taginüba lir anungji NSCN-IM-i Naga yimten tebilemte den sendaka maliba onüktem nung temulung kangabo magütsütsüla ta parnoki ashi.

Mokokchung nung police-i ozüng alema inyaksangshirtem

aziüktsü melena shishilembartem nem ang timtem agütsüba osang angashia kanga aoksar ta CNCCI-isa ashi.

Bangdakpurtemi iba ken o bushisungdangtsüla aser Mokokchung nung shishilembartem nem timtem agütsür police merenshitsu akhanger, ta parnokisa metetdaksü.

Nagaland nung shishilembartemi MCCI den külemi noktaka lir anungji ibala tetuyubatem ajanga Mokokchung nung shishilembabaren nung timtem mangutsüsa inyaksü ayongzüker, ta CNCCI-isa ashi.

Hamas-i Israel nunger 14 dena nisung 17 chiokogo



November 26, 2023 nikongdang Red Cross ketdangsurtemi Gaza nungi techiokertem anir aodang agiba noksa angur.

New Delhi, November 26, 2023 (Agencies): Deobar nikongdang Hamas telungpurtemi Israel nunger 17 dena nisung 17 chiokogo aser iba ya cease-fire tenangzüktep kübok Hamas-i tan

agi tasembenbuba nisungtem chiokba lir.

Deobar aonung tesü Red Cross ketdangsurtemi Gaza nungi techiokertem anir ao aser parnok kar Israel ket nung agütsü

aser kar Egypt ajanga ao.

Israel-i cease-fire tenangzüktep kübok Deobarnü Palestine nunger 39 chioktsü.

Maneni, Hombarnü Israel o Hamas tsungda nisung melentepba shilem pezübuba agitsü. Iba mapang Hamas-i pua alir nisung 50 aser Israel tepuokdak yua alir Palestine nunger 150 chioktsü nangzüktepa lir.

US aser Qatar nati anir international mediators-i cease-fire atsülangtsü meranger.

Deobarnü Israel Prime Minister Benjamin Netanyahu-i Gaza Strip telung nung security forces den ajurutept.

“Shingaia asenok noktangtsü makok aser asenok ket nung tashi lir. Asenok dak rara akoktsü temulungtetba aser iba alizüng atongtsü tangatetba lir aser asenoki yamaji inyaksü” ta Benjamin Netanyahu-i Israel sepaitem dang ashi.

Low Cost / No Cost Teaching Aids indang training tenzükogo



Dimapur, Yimpoksüi/Nov. 26 (TYO): Breeze Women Welfare Association (BWWA), Nagaland ajanga district shia Low Cost / No Cost Teaching Aids nung Training cum Workshop agütsütsü aliba mezüngbuba noklem Niuland aser Chümoukedima district kübok tesem ana nung November 24, 2023 aser November 25, 2023 anogotem agia liasü.

Mezüng anogo indang training ya Jawahar Navodaya Vidyalaya, Nihokhu, Niuland nung agia liasü aser tananü buba training ya Spring Valley School, Chümoukedima nung agia liasü.

JNV, Nihokhu nung training sentong tenzükka jembidang BWWA tir Ani Yepthomi-i National Education Policy (NEP) indang rateta ashi, kong Low Cost / No Cost teaching methodology indang shia lir.

Iba training nukjidong ya tesayur aser kaketshirtemi senotsü tajemba nung learning aids amshitsü aser educational scenario tajungba kuma melendaktsütsü asoshi yimya sübatsü asoshi lir, ta lai ashi.

Iba training cum workshop session nung angazükba amshia tepenja aliba lesson angazükdang low cost / no cost materials amshiba nung yaritsü

imlar ta lai ashi.

Iba sentong taruba phase tem nunga district balala nungi kaketshir aser tesayurtem asoshi iba ama training aser workshop tem ayongzükka agütsütsü.

Iba training sentong ya National Council for Science & Technology Communication (NCSTC), Department of Science & Technology, Government of India aser Kaziranga University, Jorhat and ThinkTac, Bangalore lungiemer ayongzükka agütsür.

Breeze Women Welfare Association (BWWA), Nagaland ya tajangzük mebushiba NGO ka lir, koba Dimapur nung 1982 küm tangatetba kasa aliba tetsür telok kati tenzükka liasü.

Tetsür-tebur telemsa nung ajemdaker tebilemtsü balala aliba asoshi ola adoka nokdaktsü aser tetsürtem jenjang tajungba kumdaktsütsü aser parnok nem education aser employment opportunities agütsütsü nukjidong nung iba telok ka tenteta liasü.

BWWA tenzükba sülen teti lokti aser shisaliok temelenshi asoshi inyaka arur. Saka 2008 küm iba telok nung temelenshi ka arua nüburtem aser talisa Nagaland aser alema orr aliba kaketshir aser tesayurtem dang

Educational Well Being aser Science & Technology indang tesayuba balala agütsütsü asoshi tali temolung agütsütsüsa akum.

Low cost / no cost teaching aids training ya tesayur aser kaketshir temi sayuba aser angazükba nung jenjang talang learning aids amshitsü jangradaktsütsü asoshi BWWA ajanga tenzükba lir.

Low Cost mesüra No Cost Materials ya teaching aids lir, koba sen meindoki mesüra sen ajema agi alir mesüra kaketshir reju aliba tesem nung anguba osettsüset amshia yanglur. Subject tasak aser tepenja tem kaketshir temi jangra angazüktsü asoshi amshitsü atema low cost materials ya yanglur.

Item teaching aids yagi classroom nung angazükba nung yarir, kaketshir tejangraba tali kumdaktsür aser kaketshirtem danga iba amala teaching aid parnok sasa yanglutsü ajungshir aser angazükdaktsür.

'Learning by doing' nung tajangzük aliba aser tongtipang ta angateta iba training ya Nagaland nung aliba district aser tesem balala nung agitsü aser iba mapang tesayurtem nem shisatsü balala agütsü parnoki item workshop nung angazükba bener oa pei kaketshirtem dang sayutsü.

Kohima jila nung Nov. 28 nü lokti nübuttsük alitsü

Dimapur, Yimpoksüi/Nov. 26 (TYO): Benjongbentsü aruba mechi Kohima jila nung November 28, 2023 anepdang 6:00 nungi 9:00 ako tsüngta lokti nübuttsük alitsü, ta Deputy Commissioner, Kohima, Kumar Ramnikant ajanga sangdong ka nung ashi.

Iba sentong nung Kohima nung aliba district office ajunga, Kohima Municipal Council

(KMC) aser Kohima Chamber of Commerce & Industries (KCCI) nungi shilem agitsü.

Sangdong ajangasa iba sentong nung shilem agitsüpur ajak dang kioaktsü/Dust Pan/ Nok amala nüngdakba oset bener arutsü metetdaktsü.

Team leader temi jana bendenba ya KMC jana bendendak timi bener oa indoktsü.

KMC ajanga Colonies/ Wards telungzük nung Mass Social Work ayongzüktsü, ta sangdong ajangasa ashi.

Iba atema Additional Deputy Commissioner Kohima, Rhosiethe Nguori ya overall in charge asütsü. Iba dak sendakba nung metetpelandüba lira 9612581203 ajanga jembitsü akok, ta DC Kohima sangdong ajangasa ashi.



NCC Group HQs Kohima kübok Nagaland Air Squadron NCC puri November 26, 2023 nü Dimapur nung National Cadet Corps indang 75th Raising Day munga Unit telung nung nisan asong, District Hospital Dimapur nung azü tenla agütsü aser Dimapur Airport nung junior wing cadets tem tayimtsü tila ka nung training agia liasü.

Ngada benjong salem lemsateper

Dimapur, Yimpoksüi/Nov. 26 (TYO): Rengma nunger adiaun aser adianutsürtem Ngada benjong amungba mapang salem lemsateper, ta Nagaland Angh, La Ganesan-i sangdong ka ajanga ashi.

Ngada benjong ya alu ruzüker Tsüngrem nem tenüngsang agütsütsü benjong ka lir. Ibai tia tajung aser yimchiyimjung asoshi pelatepa amungba benjong lir.

Maneni tesüiba mapang aibelen mapa inyaka aliba tatok agütsütsü benjong ka lir aser iba ya ajanga tesendaktep tasen tenzükker, ta sangdong ajanga ashi.

Tanüla tasen jazüka, tatok agütsütsü aser asen lima nung yimjung aser telungiem asoshi tangatetep tali jaoka asenok

ajaki iba benjong mungti, ta Ang La Ganesan-i ayongzük.

Rengma Naga nunger alu ruzüker tenüngsang agütsü aser pelatepa amungba Ngada benjongmung salem abener, ta NSCN/GPRN (Akato Chophi) sangdong ka ajanga ashi.

Iba benjong mapang yimtsüng nung tematiba putir 'Phensengu' ajanga benjong tenzükja yimyim ayimer aser iba benjong nung chia-jema, ken tentepa aser tsüngsangtepa amunger, ta ashi.

Ngada benjong tanüla asen Rengma Naga nunger adianu aser adianutsür madak liangma aser parnok nem yimchiyimjung, rongsen, anema aliba aser tepela bener arujangma, ta sangdong ajangasa ashi.

Blood donation awareness agüja 21,000kms jajar Kohima tongogo



Kiran Verma

Dimapur, Yimpoksüi/Nov. 26 (TYO): Kiran Verma ya India nung azü tenla agütsütsü awareness agüja kilometre 21,000 jajatsü Thiruvananthapuram nungi December 28, 2021 nung tenzük.

Ibai alima nung nisung kati 'blood awareness campaign' agüja jajaba talangtiba alitsü, koba küm ana dak tali asütsü.

India nung December 31, 2025 sülen azü aginüa nisung shinga mesüdaktsütsü mechi nüburtem nem azü tenla agütsütsü asoshi awareness agütsütsü nukjidong nung pai iba jaja ya tenzük.

COVID-19 mechi India nung tesüiba küm asem tsüngta pei sasa molungsoa azü tenla agütsütsü kanga ajema kumogo.

Azü tenla agütsür nisung tasen million 5 shi dang azü tenla agütsütsü ajungshia iba jaja ya tenzük.

Tang tashinung pai states/ UTs 17 nung district 229 ajanga kilometre 17,700 dak tema jajaago aser November 26, 2023 nü Kohima district tonga liasü.

April 9, 2023 nü Kiran Verma ya Kapil Sharma Show nung jaoka liasü. Pai June 19, 2023 nü Bangladesh, India aser Nepal (linük asem) alema tetsüng agi Siliguri corridor alema jaja liasü.

Pa tetsüng agi jajaba yaria linük tesem balala nung blood donation camp 126 ayongzükogo aser yangji azü unit 26,722 dak tema

bendenogo.

Iba campaign yaritsü mechi nisung 9000 dak temai pei sasep blood banks balala nung azü tenga agüja lir.

September 15, 2022 nü Kiran Verma-i Hyderabad nung blood bank ka semzüktsü, koba PV Narasimha Rao tenüng nung par kinunger temi yangluja liasü.

Pai Kohima sülen Manipur, Mizoram, Tripura aser North East India nung danga tesemtem semdangtsü lir.

Kiran Verma ya Delhi nungi social worker ka lir aser pai "Change With One Foundation" amenok aser iba foundation kübok Simply Blood aser Change With One Meal lapoka lir

Simply Blood ya alima nung virtual blood donation platform mezüngbuba lir, koba ajanga azü tenlartem aser azü bushirtem Uber ama sendakteptsür aser shinga danga senotsü memeshir. Iba Simply Blood ya January 29, 2017 nung tenzük aser tang tashinung azü tenla agütsütsü ajanga nisung 35,000 dak tema takum kumzükka lir.

Change With One Meal sentong kübok Delhi nung sen 10 agi chi peria chiyongdaktsür. Tesüiba küm ka tsüngta nisung 4,00,000 dak tema chiyongdaktsüogo.

Kiran Verma, Founder, Simply Blood den ya Mobile number 9810670347 ajanga jembitetsü.



November 26, 2023 nü New Delhi nung Supreme Court of India-i ayongzükba Constitution Day anogomong sentong agiba sülen linük Tir, Droupadi Murmu aser Chief Justice of India, DY Chandrachud na den tangartem tangokba noksa nung angur.

Teintet sensotem nem ita shia pension 4,000 agütsütsü: Mallikarjun Kharge

New Delhi, November 26 (Agencies): Amongnü Congress Party Tir, Mallikarjun Kharge-i, Telangana election nung Congress party-i takok ngura teintet sensotem nem pension ita shia sen 4,000 (küm ka nung sen 48,000) agütsütsü aser sensakertem nem ki asütsü atema sen lakh 5 agütsütsü, ta metetdaksü.

Telangana kübok Kalwakurthy nung election nüboyim senden ka nung jembidang pai, "Ozü sorkari ki asütsü atema sen lakh 5 agütsütsü. Teintet sensotem nem ita shia pension sen 4,000 agütsütsü. Rajiv Aarogyasri scheme kübok health insurance sen lakh 10 agütsütsü. Kaketshirtem nem shisaliok

atema sen lakh 5 agütsütsü. Mandal shia nung Telangana International English School kaka lapoktsütsü. Ibaji onok tenangzükba," ta metetdaksü. Tan hopta tetenzüklen Congress party-i Telangana nung tenangzükba onük trok metetdakja liasü; item tenangzükbaji- tetsürtem bus nung angati senzüdaksütsü, Mahalaxmi Yojana scheme kübok tetsür shia nem ita shia sen 2,500 agütsütsü, LPG ka nung sen 500 agütsütsü aser ita shia electricity unit 200 tashi angati agütsütsü tenangzükbatem lir.

Party-isa Rythu Bharosa scheme kübok küüm shia aluyimertem nem ali acre shia sen 15,000 agütsütsü aser küm

shia alu nung aayangertem nem sen 12,000 agütsütsü nangzükogo.

November 30 nü Telangana assembly election nung party asem- ruling Bharat Rasthtra Samithi, Congress aser BJP kanga atongtepa tokteptsü imlar.

Election agitsü anogo ishika dang lia state nung party balalai meranga nüboyimdar.

Congress party atema Rahul Gandhi aser Priyanka Gandhi na densema lenirtemi nüboyimdar, BJP atema Ato kilonser Narendra Modi aser party tir JP Nadda aser BRS atema Chief Minister K Chandrashekar Rao, KT Rama Rao aser K Kavitha nungeri nüboyimdar.

Ayushman Bharat nungja 'Ayushman Arogya Mandir' ta melener

New Delhi, Yimpoksuüi/ November 26 (Agencies): Centre sorkari Ayushman Bharat-Health & Wellness Centres nungja agi 'Ayushman Arogya Mandir' ta melentsü telemtetba agiogo, ta ketdangsertem osang ka ajanga metetdaksü.

Wellness Centres (AB-HWC) portal nung primary health facilities nung nungja tasen inokba noksaji upload süjang, ta metetdaksü.

Iba nungja melenba dak alia AB-HWCs-i tagline tasen, 'Arogyam Parmam Dhanam,' amshitsü, koba ajanga anema alibaji rongsen ta temaitsü sayur.

Union Health Ministry-i iba telemtetba agiba osangji states aser Union territories nem-a metetdakja nungja melenshitsu tuyuogo.

Iba mapatong tasen ajanga sorkari linük tesem ajaklen healthcare services ajungkettsütsü atema inyakba sayur, ta ketdangsertemi metetdaksü.



November 26, 2023 nü New Delhi nung AAP foundation Day anogomong nung AAP tongti aser Delhi Chief Minister, Arvind Kejriwal-i party nung inyakerem den jembidang tangokba noksa nung angur.

Centre sorkari state tem dang hospital tem renemshitsü tuyur

New Delhi, Yimpoksuüi/ November 26 (Agencies): Tang China linük nung pneumonia tashidak prokba mapang Amongnü Centre sorkari state sorkartem dang public health aser hospital tem jenjang asadanga renemshitsü tuyuogo.

"ILI/SARI indang data ji IDSP-IHIP portal nung upload sütsütsüla, talisa medical college hospitals densema public health institutions-i upload sütsütsüla," ta sangdong nung shia lir.

Centre sorkari, kidanger linük nung iba wara tensa ya sorkari mita dang repringdar, aser tang tashi nungbo aoksatsüsabo masü, ta metetdaksü.

State sorkartem dang, respiratory pathogens tendangtsü atema SARI keta aliba shirangertem teni aser terok nungi 'swab samples' agizüka Virus Research and Diagnostic Laboratories (VRDL's) dangi yoktsü metetdaksü.

Union Health Secretary-i shidi ajanga states aser Union Territories (UTs) dang hospital tem nung yipten, mozü, yimra atema mozü aser vaccines, medical oxygen, antibiotics, protective equipment, testing kits, oxygen plants aser ventilators repringshia anepalutsü tuyuogo, ta Union Health Ministry-i sangdong ka ajanga metetdaksü.

Health Ministry-i, "Item tekümdangtsü aser teinyaktsütem ya memetetba tensa koktettsü aser sensotem kümzüka alitsü atema lir," ta metetdaksü.

States aser UTs ajak dang coronavirus wara mapang nung tuyuba ama 'Operational Guidelines for Revised Surveillance Strategy' mapa kuma inyaktsü metetdaksü.

Hokolbarnü Union Health Ministry-i, China nung mejangjaba pneumonia poktetba sülen sorkari iba tensa ya mita repringdar, aser iba ama tensa ka nung memetetba emergency atema India renema dang lir, ta metetdakja liasü.

Health Ministry-isa, states aser UTs dang Integrated Disease Surveillance Project (IDSP) indang district aser state surveillance units-i talisa tanurtem aser tainlonglongpurtem dak influenza-like illness (ILI) aser severe acute respiratory infections (SARI) mita repringtsü metetdaksü.

November 13 nü China nunger National Health Commission (NHC)-i, coronavirus wara dak sendakba tenokdangba balala agenba ajanga tangu sashiba dak sendakba agi shirangertem teimba akümer, talisa iba wara agi tanurtem kongshir, ta metetdakja liasü.

World Health Organisation (WHO)-i China dang iba wara dak sendakba osang tejangja metetdakjang ta mepishio.

Gujarat nung tsüngi agi nisung 8 aiset

Ahmedabad, November 26 (Agencies): Amongnü anepdang ajungbena Gujarat nung tzunglu ghonda ana aruba den yipru ajanga teraksatsüba tulu liasü.

Mongpu masüdang ajungbena ghonda ana tzungda tzunglu 15 mm aru aser district balala nung tsüngi agi nisung 8 aiset asü.

State Emergency Operation Centre-i, taluka 251 nungi 220 nungbo tzunglu sashia aruba ajanga alu nunga aonsotsü-a sashia raksatsüogo, ta metetdaksü.

Ahmedabad yimti nung anepdang tzunglu 15 mm aru aser nikongdang-a tzunglu tera arua liasü. Meimlaba mapang

tzünglu aruba agi Rajkot nungbo nisung aika pelatepa liasü.

State kübok Mehsana, Dahod, Sabarkantha, Tapi, Botad, Amreli aser Ahmedabad district tem nung tsüngi aiba den mopung sashia aonba ajanga nisung aika asü.

Botad taluka nung arrshi küm 22 tebur ka motorbike tanidak nung tsüngi agi aiset asü aser Mehsana district nung süngdong tulu laoa autorickshaw ka anembangba lendong nung arrshi küm 29 tebur ka asü.

Tapi district nung aluyimer ana tsüngi agi aiset asü aser Sabarkantha, Ahmedabad, Mehsana den Dahod district tem nunga nisung kaka tsüngi lendong nung asü.

State tesem kar nungbo san densema kiset shiruru kar tsüngi agi aiset asü.

Ahmedabad nung aliba IMD meteorological center nung Director, Manorama Mohanty-i, northeast Arabian tzyüim aser temeket nung aliba Saurashtra aser Kutch regions nung yipru mopung süiba ajanga Valsad, Navsari, Surat, Dang, Tapi, Bhavnagar, Botad aser Amreli district tem nung tzunglu arutsü ta asadangteter liasü, ta metetdaksü.

Mohanty-i, Hombar nungibo tsüngsang-mopung jungadoktsü, saka south Gujarat aser Saurashtra kübok tesem kar nungbo tzunglu arutsü, ta metetdaksü.



Mumbai, November 26, 2023: Kiralongrartemi bomb amshia Mumbai amakba sülen küm 15 ajungba anogomong nung Mumbai nung NCP MP, Supriya Sula-i Mumbai amakdang asür, Tukaram Omble nem akhüm agütsüdag tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, YIMPOKSÜI (YIMPOKSÜI) 27, 2023

AKTD-i junga asemogo

Y akanep Dimapur yimti nung Ao Kaketshir Telongjem Dimapur-i ayongzükba lenlang asemtepba, 'The Dimapur Marathon' sentong nung Nagaland nungi dang masü saka tanga state-tem nungi dena aruagi nisung noklang trok dak temai shilem agia asemtepba sentong nung shitakba takok angurjibo Megahalaya, Manipur aser Assam nungi arurtemi anguba takokji masü saka iba sentong ayongzükba AKTD purtem asütsü. Iba asemtepba sentong ya Aotsür Aortem asoshi dang masü saka kin ajak nungi tejangrartem ajak asoshi lapoktsüba sentong ka liasü, anungji Naga nungertem dang masü saka tanga len nungia Jammu & Kashmir tashi nungi arua shilem agiba nguogo. Tetezü, joko Jammu & Kashmir tashi nung Nagaland nung tenteta aliba Ao Kaketshir Telongjem Dimapur indang meteta kümogo. Ibaji alima tesem tezü külen amman nung milen tilaka tsüklokba lilang nungi ngua aru amai lir. Telok tenteti ayongzükba sentongsa süaka iba asemtepba sentong yabo senotsü bushiba sentong ka masü saka nübo, mapang aser senotsü endoka asenoka tangar den telongjem, teputep aser tepela angutsü bushiba sentong ka liasü. Asenok loktiliba nung lokti tentet aika lir saka lokti tentet aikati pei yim, pei tzükong, pei kin aser pei züngsem adena maor aser mangur. Ano, lokti tentet tenteta liaka ali mali memetetba lokti tentetema aika lir. Ano, lokti tentet karbo tangar anema inyaksüba mapatem nungang longjemba lokti tentetema lir. Talisa, Dimapur nung lokti tentet zünger mezüngma tenteta lir, saka Dimapur ya pei lima ta angateta Dimapur asoshi tajung inyaksü bilemba lokti tentet aikabo mali. Ibayongji, asen kin asen aser nisungtemi Dimapur topur ajungtsü asoshi inyakba mapatem kangabo mangutsü. Aji oda, Dimapur asoshi temeimtsüka, ajaki Dimapur nung liner saka Dimapur asoshi tajung inyaksür agibo kanga anünger. Iba ama tia ka nung AKTD-i Dimapur ajungba alimai meteta lenlang nungi dena arua shilem agitettsüsa asemtepba sentong ayongzükba akabaji Ao kin lanurtemi Naga kin asoshi alima dang osang tajung sangdongba mapa tapu ka asütsü. Alima nung yimti ka asen meyong akümtsü asoshi tangar tsübudakja tashiyim agi alitsü merangba agi yimtiji teti atema asen meyong mesütettsü, mesüra asen akaba agi ali tululu aliyonga aoba agia yimtiji asen meyong mekümteftsü. Yimti ka asen meyong akümtsü asoshiibo aseni asen meimla aser meimsang meimba ama asen yimti aser asen limaji meimtsüla aser iba temeim jagi asen yimti asoshi asen nübo, rongsen aser shisatsü agi mapa tajung inyaksüla. Aji oda, asen mapa ajanga asen yimtiji topur jungdaktsütsüla aser alimai asen yimti ajungbaji metettsüsa asenoki inyaksüla. Aji oda, tang AKTD-i inyakba amaji mapang, nübo aser rongsen endok mesasai pei lima aser pei yimti asoshi sentong tajung ayongzükba nübortem longjemdaktsüba agi tangari asen meimtsü aser asen akümtsübuttsü. Ibaji sen agi alizüktsü makokba tashi asütsü. Iba tashi jagi dang yimti madak kibur kümteftsü. Talisa asemtepba sentong ayongzükba agi nisung aika shilem agitetogo aser ano nisung aika shilem agiba jagi nisung aikati asemtepba nung takok angutsü asoshi masü saka pei temang anema alitsü asoshi tangatetba tajung ka tanü asüng lanurtem dak aliba angur. Kin ka tashi itta alitsü atema nütüng nübo aika alitsü nungdakba dang masü saka parnokji anema alitsü nungdaker. Aji oda, anema alima temang, tokolok aser shisatsü agidang pei lima aser pei yimti asoshi mapa tajung apiteta inyaktettsü. Item tangatetba tajung agüja Aor kaketshirtemi asen kin dang masü saka tangar kintema dena külemi sentong tajung nung shilem agitettsüsa atongtetba ya, joko, tang nungi küm shia inyakba sentong ka küma aotsü junger. Ano, iba ama mesükba mapa tajung asenoki asenok asoshi dang masü saka asen den lisemer dena külemi kasa ajangzüktsüsa asenok lokti tentet ajaki asen alidak maneni inyakra, iba jagi asenoki memetetba asen aliba lima nung asenok killir masü kibur aser teben masü tokolak kümer alitsü. AKTD-i junga asemogo aser parnok den külemi asenok tanga lokti tentetema asemtsü ajungshir.

OLEMSABANG

ARASENTSÜR, ASÜYIM ASER TASÜBA

~ P. Renthly Jamir

Ao oshi nung zülur asünung Aor nungja Arasentsür ta Asüyim ta amshir. Arasentsür ya Aoo osep nung pungpapungpa-a temezünger ta süli aor ta rateta lir. Ano J.P. Mills "The Ao Nagas" kaket nunga Mozü shiteter Medicine man ta rateta lir. Webster Dictionary nunga Shaman Tribal medicine man ta shia lir. Saka yangi shinüba yabo item dang taretba English oshi nung Psychic ta Clairvoyance, prophetic ta ajaba nisung tenük agi angutsü makokba angur, ain akar, tarutsü tia indang shiteter, tasürtem tanela den o tongdar, nisung tebilemba ateta angurtem. Alemlia arasentsürtemi shirang anüptsüba aser yangji shirang mena ta ano tarutsü tia takzüteta ashiba dang masü, saka nisung ka temenen tanelai sota aliba-a alangzükba bentsür aru. Ano karbo joko süogo ta kecha lepa arutsü teimla maka alidang anüng kotaklar dang tua tetepsettsü sentaka yur aliba meshizüka tanaben shia arudaktsüba tatalokba otsü aika jembir. Asü yim tashi oa mapa tulu inyakba Arasentsür tashi tulu liasü. Item melena tanüa mangdang, Shiner, tanüptsür, tenük ain akartem lir. Onok tanur asüdang 1950s nung Yaongyimsen nung Merenlemba yamala tamanger pai sarasadem dang asür dena anguba nisung ka liasü. Manemer shirang kong mena pai jakaji shitak shitet. Ano tasür tanela pa, pa, yamaji arua lir ta shitet. Nia tanur asüdang kütsü den shiranger ka kidangi aoba Merenlemba sarasademi aruba pai sarasadem shirangla indang anguba kechi ashi tang tashi bilemteter, onsara temezüng.

Asü yim ta süra tasür lim, tasürtem tanela aliba lima (Spirit World Astral plane) ta ajar. Hindu nungeri Sanskrit oshi agi Devachan, tanela lima tsüngremtem aliba lima ta, Heaven ta ano Buddhist amangertemia Shangrila ta Paradise ta tenüng balala ajar. Khristantemia Kotak ta Heaven ta ajar. Akhi mapang Aor arasentsürtem aiben iba lima yagi akümlirtemi o tongdar tenyai yok. Parnoki oa tasür nela den ajurutepe jembir aru. Iba Devachan lima nungji kodanga meshiranger, kecha tejen makümer, tamajung indang mangashir, temeim taochi agi sünga alir. Tantsür tambur makümer, arishi küm 35 ama dang nisung ajak alir ta ashir. Iba lima ya tobur onsara tajung ta Thomas Edisoni ashi. It is very beautiful over there.

Iba lima nung tenük agi majijem tobur tajung naro tsüki tatembang maka oa lir aser terunem onsara tajung menemer. Shirnok asüyimi odanger aru shingaia tanaben akümlir limai meyipa marunür ta ashir. Invariable no one want to go back to earthly life. Asenokia, süjia oa alir jashidang meyipa marunüi aru ta ashiba aiben angashiogo. Devachan lima denji medemdangtsüsa iba alima nung tesem kecha maka oda Sir William aser Lawrence nung yamala tenük ain akar parnok ashiba agi ibalima naro tsüki tobur ajungbaji tera mesükba Scotland lima nung aliba Findhorn naro tsükiang lir ta ashir. Alima nung tobur tajungtiba Findhorn naro tsüki nung apungba terunem yabo khenyongi balaka menemer aser golap nara-a yangi apungba tanga den balaka ta ashir. Remarkable, magical place. Alima nung nungtoko ain akar tanüptsür world renowned psychic and spiritual healer Mary T. Brown lai la kaket "Life After Death" nung iba tejen makümba lima indang kanga junga shia angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

UK nung akhidang aliba Anglican tekülem ki ka ngutetogo



November 26, 2023: Community archaeology project 'Rendlesham Revealed'-i UK kübok Suffolk anasa Sutton Hoo nung akhidang aliba Anglican tekülem ki ka ngutetogo, ta metetdaksü.

Suffolk County Council indang community archaeology project Rendlesham Revealed-i ngutetba Khristan tekülem ki ya küm 1,400 tejaklen East Anglia nung Raedwald Chuba mapang aliba asütsüa akok. Raedwald Chubaji AD 625 nung asü.

National Lottery Heritage Fund nungi pound sen 517,300 agüja ali tua bushisüngdangba project nungji Suffolk Family Carers, Suffolk Mind aser local primary school tanurtem

densema volunteers 200 dak temai shilem agia liasü.

University of Cardiff nungi consultant archaeologist aser project advisor, Professor Christopher Scull-i, "Rendlesham nung ali tua bushisüngdangba ajanga bushitetbatemji ajanga East Anglican chubatem tashi tulu aliba aser rongsen jenti aliba kuli anguba den külemi par mapang loktiliba meteter," ta metetdaksü.

"Iba kiojen ya England tesem balala nung tekülem kitem den kanga mesükteper, anungji iba kiojen ya East Angles nung chubatem Khristan tekülem sentong agidang amshiba asütsüa akok," ta paisa metetdaksü.

2008 küm nungi tenzüka Suffolk County Council Archaeology Service-i Rendlesham nung archaeological survey maparen nung yaritepa arudar.

Suffolk County Council indang Protected Landscapes & Archaeology Deputy Cabinet Member aser Conservative councillor, Melanie Vigo di Gallidoro-i, "Iba project nung shilem agirtem ajaki nüma atangtsüla, kechiyong asenok ajak longjemer asenoki alizüng ka tongtetogo. Taküm iba maparen nung volunteer 200 dak temai shilem agi aser ibaji densemabo küm asem tashi fieldwork programme nung volunteer 600 dak temai shilem agiogo," ta metetdaksü.

Assam nung United Churches Assembly nung pastor anema ken o benok



Pastor Jeremiah Basumatary

Guwahati, November 26 (Agencies): Tawa Guwahati nung police-i Beltola Fellowship of United Churches Assembly (UCA) nung pastor kati tainlonglongpurtem anepja tamangba yimsü meyipdaksür, ta tai tonglokja apu.

Ajisüaka court of the Additional Sessions Judge (FTC) No 3, Kamrup Metro, Nishanta Goswami-i pastor nem interim bail agütsüogo, kechiyong pastor anema benokba FIR nungji pastor-i aibelenba tesem aser mapang metetdakja maliasü.

Ganesh Nagar, Basistha nung alir Sarbananda Dakua'er jabaso, Nayanjyoti Dekua-i pastor anema ken o agütsüba

nung ajemdaker Basistha police station nung pastor Jeremiah Basumatary anema ken o benok.

FIR nungji, pastor Jeremiah Basumatary-i sayatenya ajanga tashidak balala aneptsütsü ta nangzüka tangartem Khristan yimsü dangi meyipdaksür, iba denji külemi pai molumi tetshia amokmerener mesüra taküm jenjang tajungba kümdaksütsü ta nangzüka yimsü meyipdaksür, aser itemji ashikülak mapa lir, ta shia lir.

Court-i, "FIR nungi item tatalokba anogo shia mali. FIR nungji pastor-i sayatenya ajanga tain longlongpurtem taneptsü ngudaksür, aser pai parnok dak tim mesüi kongshir ta shia lir,"

ta metetdaksü.

"Pastor-isa kar Khristan yimsü dangi meyipdaksütsü merang, ta shia lir. Ajisüaka FIR nungji item atalokba indang tejangja shia mali," ta court-i metetdaksü.

"IPC kübok Arrla 295 nung ajemdaker pa anema tai tongloktsü; iba ozüng kübok küm asem tashi tepuokdak ayutsü aser Juvenile Justice Act kübok Arrla 7 nung aibelenba atema küm asem tepuokdak ayutsü aser Drugs and Magic Remedies (Objective Advertisement) Act 1954 kübok Arrla 7(a) nung aibelenba atema ita trok tashi tepuokdak ayutsü," ta court-isa metetdaksü.

"Iba aibelen ya tulu aser tai tonglokja alisangji tamangba yimsü reju den sendaktepa lir, anungji pa bail nung chiokra pai jena aotsüa akok. Basistha police station nung benoka aliba ken o metembang tashi tai tonglokja alisangji sen 30,000 bond ajanga bail nung chiochtsü," ta court-isa metetdaksü.

Pastor-i bushisüngdangba ketdangsertem den amaliteptsü aser FIR nung shia aliba ama joko tangartem yimsü memeyipdaksütsü, ta nangzüka sülen pa nem bail agütsü.

ANOGO ABEN TSÜNGREM DEN

Ozüng Agi Asem

T.Ken 148: 1-14

Tsüngküm mongpu balala asenoki ajurur. Yipru mopung arudang asenoki tsübur aser nemnemer. Asükwa kanga mokonga rejep aludang kechiba, ta nemnemer. Item ajak atalok dang asenoki T.Ken 148 ji bilemtetdi, aser Tsüngremi ajak azüoker ta bilemtetdi. Pai tekong 8 nung tejangja tenangzükbba tulu agütsür: "Mi aser rür, rüjeb aser tzü tangula; yipru mopung, Pa O atalokja sangang".

T.Ken 148 ajunga jagi Tsüngrem O tazüokba nung aliba sayur. Kodang kotak nung Pai jembir alima nung aji ataloker. Tekong 1-6 nung anüngtemi Kibuba tushiba ashir. Tekong 7-10 nung alimai Kibuba tenüng asangba ashir. Aser tekong 11-14 nung nisung ajaki, tanur, tain, chubatem, obendangertem aser tilar ajaki Kibuba tenüng asangtsü ashir.

Kechiba? Kechiaser Pa Oi yanglur. Tekong 5 nung parnoki Kibuba tenüng sangdakjang; kechiyong Pai mela aser parnoki poktet, ta ashir. Ano Pai parnok "teti asoshi yanglu" (t.6).

Tsüngremi iba lima obang putepba ajanga manir saka Pa tebang O ajanga anir. Tetezü Pa ozüng agi anir. Asenok anitsü asoshi taküm anitsü asoshi Pa Oji teperi. Tsüngremer Oi yanglu, lidaktsür aser Pai mulungba ataloktsür. Nai yipru ajurutsü; tenemnem; iba melen bendanga agüjang. Yipru mopung aser tesüngjem mopung jagi Tsüngrem O ataloktsü ta bilemtetang. Tsüngremer tazüokba O aser ne taküm yangluba Pa O nem bendanga agüjang.



Aoyimti Baptist Arogo nung sannüker Chuchuyimlang nung Wb. Tamsü Jamir aser par kibong Kibuba tenzükbba mapa nung ano asentenshir bendanga tenzüksü atema November 26, 2023 amongnü temoatsü sentep nung ABAM Ordination Council ajanga ordain sütsüba noksa nung angur. Pa ya ABAM ajanga ordain sütsüba tenzükertem rongnung Reverend 292 asütsü. Rev. Tamsü Jamir ordain sütsüba Council nung Rev. Sentisashi Aier, Rev.Wati Kichu, Rev.Tamsüwati, Rev.Lanuakum aser Rev.Dr.Bendang Longkumer nungertem liasü. (Dimapur, Nov.26,2023).

**AO OSHI ANGAZÜKDAK:
TANÜ ANGAZÜKTSÜBA OJANG**



Senden

(v) adenshi, telok sentep (gathering together)

* Lokti senden ajak sarasademer tenzüker.

Senkensenra

(adj) chiyongtsü achitsü temulungi magizükba, chiyongtsü ashishiba (fussy, finicky, selective on food)

* Telok nung kanga senkensenra süra timatemtsü.

OLONG PAITEP # 6626

16x16 crossword grid with numbers 1-16 indicating starting positions.

TIPIEN

- 2. Auonung chiyongtsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A ___ g
6. Mopung apodoka
9. Tonglipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 6625 TELANGZÜBA

TIPIEN :

- 2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Plo,
9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA



India nung kümshia November 26 nü Constitution Day ('Samvidhan Divas) amonger. November 26, 1949 nü Constituent Assembly of India-i Constitution of India agizük aser iba sülen January 26, 1950 nungi mapa kuma tenzük. India sorkari kümshia November 26 nü 'Constitution Day' amongtsü lemtetba osang Ministry of Social Justice and Empowerment-i November 19, 2015 nü sangokja liasü.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Constitution Day nung Mahatma Gandhi kürakyanglu ka saya



Itanagar, November 26, 2023 (Agencies): Constitution Day nungtem nung Arunachal Pradesh Governor Lt General KT Parnaik (Retd)-i Mahatma Gandhi indang kürakyanglu ka sayatsüogo.

'Into the Future' ta ajaba feet 16 talang kürakyanglu ya Legislative Assembly building, Itanagar nung yanglua lir.

Arunachal Pradesh nung tanü Pink Constitution Day ta ser among aser iba ya Women's Reservation Bill (Nari Shakti Vandan Adhiniyam) agizükba atema tetushi agüja among.

Iba sentong nung Governor Lt General KT Parnaik (Retd), Rajya Sabha Deputy Chairman Harivansh Narayan Singh, Union Minister Kiren Rijiju, Chief Minister Pema Khandu, State Legislative Assembly

Speaker Pasang Dorjee Sona, Deputy CM Chowna Mein, Dy Speaker Tesam Pongte, minister aser MLAs tem aden.

"Tetsüri anir terenlok alitsü, tejakleni aotsü, tashi itdaksütsü aser ajak kasa ta asüba tangatetba nung state sorkari temulung agütsür" ta Chief Minister Pema Khandu-i ashi.

"Arunachal Pradesh nung Constitution Day sentong tulu ayonga amongba atema pelar. Legislative Assembly Speaker-i kaga dang temulung agüja iba sentong anepaluba atema tenüngsang agütsür" ta Union Minister Kiren Rijiju-ia ashi.

2026 küm census agiba sülen women's reservation maparen tenzüksü, ta Rijiju-isa ashi.

"Assembly kima nung Gandhi indang kürakyanglu ya pai pa semchir den külemi jajaba

indang lir. Iba ajanga tanurtemi tarutsü nung linük anitsüba indang osang agütsür. Arunachal Pradesh nung tetsürtemi mapa tajung aika inyaktetba atema tenüngsang agütsür aser asenoki maneni women's reservation nung temulung agütsütsüla" ta Arunachal Pradesh Speaker Pasang Dorjee Sona-ia ashi.

Delhi nung amenoka aliba sculptor Ashish Bose-i yongmen yin agi ita ana tashi yangluba kürakyanglu nung Mahatma Gandhi aser par semchir Nanu bhai dena lir. Iba ya Bombay tzüküm nung Gandhi aser par semchir na tangokba lir.

Rajya Sabha MP Nabam Rebia-ia Constitution Day ya kanga dang tongtipang anogo aser Women's Reservation Bill agizükba atema benjunger ta ashi.

SDF 2.0-i 2024 elections nung takok angutsü: Pawan Chamling

Gangtok, November 26, 2023 (Agencies): Taoba Sikkim Chief Minister aser Sikkim Democratic Front (SDF) tanishir Pawan Chamling-i sangküm elections nung parnoki takok angutsü osang metetdaksüogo.

2024 elections sülen SDF 2.0 sorkar akümtsü ta pai ashi.

Sikkim Krantikari Morcha (SKM)-i ozüng alema inyaksangshir aser iba ya tayongzükba tulu ka lir ta Chamling-isa ashi.

"Lanu putui taginübatem den

liromedema SDF nungi SDF 2.0 melenshir. 1993 nungi 2019 tashi SDF sorkari Sikkim ya India nung takartiba state tasembuba kümdaksü, sensaktia kanga ajema kümdaksü, taziüngertem aika adokdaksü aser terenlok mapa aika inyaktet" ta pai metetdaksü.

"SDF nung lennir tejen aser lanurtem meyoktepba ajanga tashi itshiogo aser alizüng tasen ayur. SDF 2.0 nung temeyoktep ajanga taruba elections atema renema lir aser tesüiba dang nungi sorkar ketdangsübaren

tajungba asütsü" ta Chamling-isa ashi.

"SDF 2.0 indang mission tasen ka lir aser ibaji democracy mesamadaksütsüba lir. 2024 elections ji kanga dang tongtipang election ka asütsü aser Sikkim kümzükba election ka asütsü. SDF-i Sikkim nung alirtem tashi itdaksütsü nükjidong lir saka SKM-ibo bendangertem ang tashi itdaksür" ta paisa ashi.

2024 elections ajanga Sikkim atema tarutsü latettsü aser Sikkimese nungeri yimsü asütsü ta Chamling-isa shisem.

Meetei-Mayek oshi nung Indian Constitution sayaogo

Imphal, November 26, 2023 (Agencies): Deobarnü Manipur nung Constitution of India Meetei-Mayek edition sayaogo.

Chief Minister N Biren Singh-i Meetei-Mayek oshi nung Diglot edition sayatsü.

Constitution Day amongba nungtem nung Manipuri oshi nung Diglot edition saya. Iba sentong nung sorkar ketdangsürtem, minister tem aser MLA temi Preamble of India azüng.

Iba lemtet ya Manipuri script ajungketba dang masü saka Manipuri oshi (Meiteilon)

jembirtemi Indian Constitution tali tejangjiba angatettsü.

Constitution yanglur küm 73 tashi aruaka local oshitem nung memeyipzükba agi nisung aika memetet lir. Iba edition nung 105th Amendment tashi dena lir aser Meetei Mayek script nung lir, ta CM Biren Singh-i ashi.

"Onok kanga nüma atanger. Manipur nunger aser sorkar tenüng nung Prime Minister dang kanga pelar. Manipur ya state tila ka dang aser nütsüng yongsük ishika dang lir, aji ta süaka Prime Minister lenisüba kübok onoki ozü oshi nung Constitution of India

adoktetogo" ta pai ashi.

BJP-i aniba Centre sorkari Manipur state aser nübortem asoshi temulung agüja inyaker, ta paisa shisem.

"Prime Minister Modi aser Union Home Minister Minister Amit Shah nati Manipur nem ILP agütsüogo. Tanü onoki Constitution of India meyipzükba adoker. Anungji Central lennirtemi yamai temeim sayuba ya meyiptsütsüla. Ni Manipur nunger dang India tajungba aser telongjem atema külemi inyaksü mepishir" ta CM N Biren Singh-isa ashi.

Gaza nung rara anena liaka West Bank nung tesem kar amak

Jenin, Yimpoksüi/Nov. 26 (Agencies): Israel sepaitemi occupied West Bank nung tanur ka densema Palestine nung ti tepset, ta Palestinian Ministry of Health ajanga ashi, anungji October 7 sülen West Bank nung Palestine nung nisung 239 tepsetogo.

Israel sepaitemi Jenin yimti nung Honibar aonung aser Deobarnep Palestine nung nisung pongu kaset aser ano West Bank nung nisung asem tepset, ta ministry ajanga Deobarnü ashi. Israel-i Jenin amakdang Palestine nung nisung trok yiru.

Palestinian news agency Wafa ajanga ashiba agi, Israel sepaitem tesem balala nungi Jenin telungi aita injang khaloktsü, sorkar meyong mozüki aser Red Crescent Society indang headquarters lungpang.

Israel mitkar indang odongtar office-ia iba osang jangjaba mapang lir ta shiogo.

Gaza Strip nung Israel aser Palestine nung Hamas telok tsüngta anogo pezü rara anena atatsü tezüngzüktep agiteper liaka West Bank nung iba lendong ya atalok. Israel-i anünglen aser alilen nungi Gaza Strip amakba mapang Palestine nung tanur 6,000 densema nisung 15,000 jungnüa tepsetogo.

Hamas-i ajungbena October 7 nü Israel amakdang nisung 1,200 tepset aser nisung 240 pua bener ao ta Israel ketdangsür temi ashir.

Honibarnü Hamas-i Israel nung nisung 13 aser Thai nung pezü chiokogo aser iba melena Israel-ia Palestine nung tepuokdak alir nisung 39 chiokogo. Israel nung pua alirtem aser Palestine nung tepuokdak alirtem ano chioktsü imlar.

October 7 sülen Israel sepaitemi occupied West Bank nung tanur 52 densema

Palestine nung nisung 237 shi tepsetogo aser ano nisung 3,000 dak tema pua, Gaza nung rara tenzükba sülen West Bank nung tesem balala amakba tali kumogo.

2006 sülen occupied West Bank aser East Jerusalem nung Palestine nung asoshi taoba küm tamajungtiba liasü, ta United Nations ajanga ashir. Item tesemtem nung Israel sepaitemi Palestine nung nisung 170 tepsetogo. Taküm Israel sepaitem aser settlers temi occupied West Bank aser East Jerusalem nung Palestine nung nisung 371 tepsetogo.

Israel-i Gaza nung hopta tenet tashi tanen makai makyonga arudang Palestine nung nisung 14,854 tepsetogo aser item rongnung shilem asem dak tema tanurtem lir, aser nisung million 1.5 dak tema pei ki yutsür tesem balala nung jenoka lir, ta Gaza ketdangsür temi ashir.

KIBUBA DANGI OR KÜM KA AJUNGBA BILEMTER



Asür Takonangla (Ungma) 27th Nov. 2022

Temeim oja, nai onok toktsür or küm ka ajunger. Ne temeim sayu o tarok aser miim sarasadem kodanga mamateter. Na meliaka na menungra sarasadema amonger.

Chirnurtem aser Kinungertem.

Mulungnen O



Lt. Miss TEMJENKALA JAMIR (Chuchuyimlang) 19/02/2000 - 22/11/2023

"Kodang ni ontakdir ni tesünep nung amua odi; kechiaser oh Kibuba nai dang ni kümzüka lidaktsür." -T. ken 4:8

Onoki teti meima aliba jala asür TEMJENKALA JAMIR shirangba mapang nungi iba akümüli doktsür aoba mapang tashi onok shisabulu aser temulung zürep tia nung alidang kija, kibong, kiyonger, medemertem, Arogotem aser lokti tentet balala, ana aser talang nungi nübu, rongsen, sarasadem aser shisatsü agi ozü den yaritepogo, nenok ajak dang kanga pelaba lemsateper.

Nenok aria bilemba temi aser sarasadem ajanga ozü mulung süneptsür. Ozu-i tenüngteta aser tsüngdong arua pelaba meshitetaka asenTulusang Tsüngremi nenok taküm, kibong ajak moajangma ta sarasademtsür.

Temeim Tsürabur, Adianutem aser Kinungertem.

Sierra Leone ajunga nung curfew benokogo



Freetown, Yimpoksüi/November 26 (Agencies): Sierra Leone yimtiba Freetown nung nisung telok kati military barrack ka amakba sülen linük ajunga nung curfew benokogo, ta sorkar sangdong ka ajanga metetdaksü.

Iba anüolen aliba linük ya election sülen mapang talangka mepetmesü nung arur tang iba lendong ya atalokogo.

Sierra Leone sorkari Deobarnü ashiba agi, military indang Wilberforce barracks tongtiba amakertem sepaitemi nokdangogo aser tensa aziüoka lir.

Information Minister Chernor Bah-i Deobarnü sangdong ka ajanga nüburtem dang sorkar aser state security forces temi tensa aziüoka lir ta shiogo.

Bah-ias, nüburtem dang kilong nung dang alitsü asoshi mepeshia metetdaksüogo, kechiyong security force temi maneni iba barrack amakba nung densema alitsü ta temulung melemi bilemertem pudena odar, ta ashi.

Tenük kuli agütsürtem AFP news agency dang ashiba agi, parnoki Deobarnü anepdang linük yimtiba nung pranbong akhaba aser bomb apokba ola angashia liasü aser social media sabang balala nung

video lemsatepba nung yimtung nungi mokozü atokba nguogo.

Tanga tenük kuli agütsürtemi ashiba agi, parnoki Murray Town district kübok barrack ka nung khatepba aser Freetown nung ano tanga military barrack ka nung khatepba ola angashiogo, ta AFP-i metetdaksü.

Sierra Leone tir Julius Maada Bio-ia, security dak sendakba nung tetsükdaksü adokba indang osang pa indang official X social media account ajanga Deobarnü jangjashitsüogo aser "renegades" telok ka dak tai tonglokja liasü.

Bio-i ashiba agi, tensa aziükogogo aser security force temi iba telok nungi jenshia orr aliba züngsemtem raktoktsü atema inyaksangshidar ta ashi.

Paisa, lisopur ajak dang linük nung democracy kümzüka ayutsü atema longjemer inyaksangshitsü ayongzüka liasü.

"Asen linük yimjung nung toktsütsüji kechaia malizüktettsü aser linük yimjung aser tamendakdak anokshitsütsü merangba tashitem anema maneni longjemer nokdaksü," ta tir-i ashi.

Deobarnü West Africa

indang regional bloc Economic Community of West African States (ECOWAS)-ia Sierra Leone nung temzüng ozüng raksatsütsü merangba atema aitsüogo.

Taküm June ita election nung tir Bio tanaben shimshiba sülen Sierra Leone nung yimden yimsüsüba tsütsü mepetmesü tulu adoka liasü.

Küm metsü tejakdang Sierra Leone nung küm 11 tashi civil war raraba sülen taküm agiba election ya pongububa liasü. Iba rara nung nisung meyirejang aika taküm samaogo aser linük rongsenketzünga kanga mejungi raksatsüogo.

International observers temi ballot azüngba nung ochi mashi inyakyim sendaka aliba atema aitsüogo aser Sierra Leone nung opposition party temi result anema nokdak aser iba sülen sorkar nungi atsüngina liasü.

Ita pongu tejakdang election nung takok anguba sülen Bio tang tashi taitüsüba aika ajangshia arudar, kechiyong linük rongsenketzüng kanga mejungi lir.

Sierra Leone nung nütsünyongsük million 7 dak tema aliba nungi shilem 60 bo sensak tia nung lir aser Africa anüolen aliba linüktem rongnung iba linük nung lanur tem mapa mangur timtiba lir.

Military-i sorkar aiben atsüngba sülen Sierra Leone jenjang kanga mejungi aküm koba ajanga iba tesem nung democracy dak kanga mejungi kongshir lir.

Africa anüolen aser teyongsü nung 2020 küm nungi tang tashi nung military-i sorkar ti tashi atsüngogogo, kong Mali, Burkina Faso, Niger aser Guinea densema lir.

SANGDONGER

13buba Marsosang Football Trophy 12th Dec. 2023 anogo nungi tenzüka 16th Dec. 2023 tashi asayatsü. Anungji tejangratem asoshi form, item dokan tem nungangutsü.

Walok, Mokochung & Tems Enterprises, Chuchuyimlang

Contact No. : 9612454549 / 7085251794

Prize

Champion : Rs. 1,50,000/-
Runners up : Rs. 80,000/-
Semi-finalist Loser : Rs. 10,000/- (each)

Co-Sponsor

Runner Up Sponsor by Arenlong Jamir.
PA to Minister Rural Development
Best Player Sponsor by Lt. Insumar Family
Best Goal keeper Sponsor by Gilgal
Best Defender Sponsor by Talitemjen & Family
Highest Goal Score Sponsor by I. Sunep. Dimapur
Best Team Sponsor By Medemer Telongjem Telok

Camarda Serie A puti otsü nung asayar tanobusang kümogo



Yimpoksüi/November 26, 2023 (Agencies): Honibarnü arishi küm 15 ser anogo 260buba nung Serie A nung asayaba sülen Francesco Camarda ya Serie A puti otsü nung asayar rongnung

tanobusang kümogo. Striker ya AC Milan pur Fiorentina den asayaba mapang substitute ama ia asaya liasü. Taoba mapang iba record ya Bologna nungi asayar Wisdom Amey-i bener liasü, shiba Serie

A nung mezümbuba asayaba mapang arishi küm 15 ser anogo 274 tain liasü.

Premier League nunga iba record ya Ethan Nwaneri-i bener lir. Pa arishi küm 15 anogo 181 asüba mapang Arsenal tenung nungi 2022 küm September ita Brentford den asaya liasü.

Olivier Giroud suspend sütsür aliba aser Noah Okafor yirur aliba mapang Camarda ya first team nungi asayatsü atema jaoka liasü.

Pa September ita-ang mezümbuba Uefa Youth League nung asaya liasü aser iba mapang pai Newcastle United den asayadang goal ana idaktsü.

Arishi küm 16 majung tsüngda Italian topflight nung asayaba asayartem rongnung Camarda ya asayar tibuba kümogo.

Rashmikaa-i tang mezümbuba ITF title ka benogo

Yimpoksüi/November 26, 2023 (Agencies): National championship tesüsabuba koker alila Rashmikaa Bhamidipaty-i Deobarnü Women's World Tennis Tour final nung Zeel Desai koka tang mezümbuba ITF title ka benogo.

Final asaya ya Rashmikaa-i 6-0, 4-6, 6-3 agi koka senpet USD 3935 agizükogo aser WTA points 50 nguogo. Desai nema senpet USD 2107 agütsüogo aser WTA point 30 nguogo.

Asaya nung Desai-i kanga aibelen mena aser iba maongka agia Rashmikaa-i mezümbuba set tanabuba game nung Desai indang serve break asü aser iba sülen set ka danga mekokdaktsü mezümbuba set koka liasü.

Tanabuba set nungbo Desai-i mezümbuba game nung Rashmikaa indang serve break süa liasü.

Ajisüaka Rashmika-i game pezümbuba nung Desai indang serve break asü aser iba sülen

game pongububa nung la indang serve break mesüdaktsü la 3-2 agi tejakdang aküm.

Iba sülen maneni Desai-i game asem atonga koka la 5-3 agi tejakdang aküm aser iba sülen 6-4 agi asaya koka liasü.

Deciding set nung serve junga motetba sülen Desai 0-3 agi tesülen liasü.

Kasa mapang nung Rashmikaa-ia la indang forehand kanga junga amshia cross-court shot tajung kar asaya aser iba atema Desai asoshi kecha telangzüba maliasü.

"Ni asaya kokogo ta tang tashi mamangteter. Zeel ya asayar tajung ka ta ni meteta lir aser ni set 3 asayatsü asoshi renemer liasü.

"Ajisüaka tanabuba set nung tamakok anguba sülen ni takok marok angutsü asoshi takokba tashi meranga asayatsü telemtetba agi aser yamaji ni asaya kokogo," ta Rashmikaa-i ashi.

Paris Olympics atema wrestling quota ngur alirtema trials agitsü

Yimpoksüi/November 26, 2023 (Agencies): India nung wrestler shirnok Paris Olympics atema quota ngur lir parnoka iba asayamung nung shilem agitsü atema kidang trails nung takok angu nungang shimtsü, ta iba asaya achaayangba ad-hoc committee-i Honibarnü sangdongba selection policy tasenbuba nung shia lir.

Taoba mapangbo quota anurtem Olympics nung indang indanga shilem agidakja liasü. Wrestling nung Olympics quota ya iba quota anguba asayar atema masü saka linük atema lir aser iba temzüng ozüng melenshiba ajanga form aser fitness dak ajemdaker wrestler tajungtiba shimtsü asoshi maongka agütsür.

Taoba mapang quota anurtem indang indanga shilem agidaktsüba atema Wrestling Federation of India lenla balala nungi aitsüogo. 2016 Rio Olympics matong tsüngda 74kg quota akoksang Narsingh Yadav aser Olympic nung medal ana tashi ngur alisang Sushil Kumar dak sendakba nung mepetmesü tulu adoka liasü.

Tang tashi nung Antim Panghal-i (53kg) quota ka ngua lir. Pai September ita world championships nung bronze

medal ka ngua liasü. Ano Kyrgyzstan nung taruba küm April 19 nungi 21 tashi Asian Olympic Qualifier aser Turkey nung May 9 nungi 12 tashi World Olympic Qualifiers asayatsü lir anungji India nung wrestler temi iba asayamung ana nung quota angutsü maongka lir.

Selection policy tasenba ya United States indang policy nungi apua yangluogo. Iba ajanga quota angurtem nem anisüngzüik ka agütsür shirnok trials akokertem den tokteptsü. Iba 'wrestle off' nung quota ngur aliri khen akoktsü nüngdaker aser challenger-i anaben tashi atonga akoktsü nüngdaker.

Policy tasenba ajanga Vinesh Phogat (53kg) nem maongka ka agütsür, shiba temekok surgery agir lir. World championships nung medal ana tashi ngur alila ya Antim den asayatsü atema tetoktepba ana tashi ajanngtsü nüngdaker. Vinesh mezümbuba February ita trails agiba mapang top four nung tembangtsüla, iba sülen asayar pezü ya Nordic format (round robin) nung May 31 nü asaya-a takoker jangjatsü.

May ita WFI suspend sütsüba sülen iba panel yagi asaya achaayanga arudar. WFI

election inyakyim ya tatembang ka dangi arua liasü saka Punjab aser Haryana High Court-i sota yua lir. Federation ya election menoa magiba atema United World Wrestling (UWW)-i de-recognize süogo. Supreme court-i iba ken o ya November 28 nü angadangtsü.

Taoba küm national camp magi aser wrestler tem asayamung tongtibangtem asoshi parnok indang training centre tem nung dang renemshia liasü. Ad-hoc committee-isa, wrestler shirnok senior nationals nung top four nung tembangdir parnok Asian Games aser world championships nung medal ngur alirtem den külemi camp nung shilem agitsü atema jaoktsü, ta metetdaktsü.

February ita 27 nungi 29 tashi trials agiba mapang mezümbuba anogo finalists ana shimtsü atema knock-out asayatsü. Best-of-three bout final nung takok angur tanabuba anogo qualifiers atem asayatsü. Final nung tamakok anguba asayar ya Asian Championships nung asayatsü atema maongka angutsü. Antim kija February trials nung masayatsü aser pa Asian Championships nung asayatsü atema temelaba agütsüogo.

China Masters: Satwiksairaj & Chirag na final nung tsükogo

Yimpoksüi/November 26, 2023 (Agencies): India nung tebur tarep asayartem rongnungi temaba jenjang nung aliba tarep Satwiksairaj Rankireddy aser Chirag Shetty na Deobarnü China masters tebur tarep asaya final nung tsükogo.

Deobarnü Shenzhen nung China Masters 2023 final asaya nung Satwiksairaj aser Chirag na ya China nung tarep Liang

Wei Keng aser Wang Chang nati 19-21, 21-18, 21-19 agi koka liasü.

India nung nungtu badminton asaya ana ya taküm tang agi BWF World Tour final pezümbuba nung shilem agiogo. Tenati taküm Swiss Open 2023, Indonesia Open 2023 aser Korea Open 2023 ta koker lir.

Maneni Satwik aser Chirag natisa Badminton Asian Championships kokogo aser

Asian Games nunga gold medal ngua taküm kanga junga asaya arudar.

India nung tarep yagi iba asayamung semifinal nung He Ji Ting/Ren Xiang Yu 21-16, 22-20 na koka liasü.

Kasa mapang nung Keng o Chang nati tanga semifinal asaya tanga ka nung külem China nung asayar Chen Bo Yang aser Liu Yi 21-17, 14-21, 21-15 na koka final tongteta liasü.

Taoba England manager Terry Venables süogo



Yimpoksüi/November 26, 2023 (Agencies): Taoba mapang England manager Terry Venables arishi küm 80buba nung süogo.

Pa asaya aliba mapang Chelsea, Tottenham, QPR aser Crystal Palace nungi asaya 500 dak tema nung asayaogo.

Par kinungertem sangdong ka ajanga ashiba agi, "kinungbo aser tebu tajung ka asüba ajanga onok kanga temulung raksar, shiba mapang talangka shiranga lir yashi yimjung nung süogo."

"Mangyim jashi nung aliba mapang onok meinprong mesüi mang yimtettsü asoshi nenok dang mepeshia asüngdang," ta parnokisa ashi.

LMA chief executive Richard Bevan-i ashiba agi, "LMA züngsem aser taoba mapang LMA tir Terry

Venables asüba osang angazüka LMA dak sendaka alirtem ajanga temulung koremer. Iba amala mangyim jashi mapang onok sarasadem aser tebilemba Terry'er kinungertem den lir."

Venables ya Tottenham nung kanga dang tongtibang asayar ka liasü. Pai iba club nungi asayar aser coach ama FA Cup kokogo.

"Taoba asayar aser manager Terry Venables asüba osang angashia club kanga temulung koremer," ta Tottenham club sangdong ka ajanga metetdaktsü.

Parnokisa Terry'er kinunger aser medemertem den asükhulemsatepba den pa tanüla teti tatem makadak

anisüngzükdakjang ta sarasademja ataba lemsatepogo.

BILEMDANGANG

"Ni junga mangazük tashi tajungtiba angazüktsü merangang."